

Vnd viel andere prognostica haben sie mehr an dem Gesirn
des Himmels.

Darnach haben sie auch sonderliche Merckzeichen an den Win-
den/nemlich/weiß Septentrio, aqvilō, Circius vnd Caurus wehen/
denn diese vier Winde treiben die Wolcken vber einen Hauffen zu-
sammen/vnnd zwingen sie gar hefftig/ daß der Wind vnnd feissen
Dünste/ so in dem Gewölcke vorhanden seind/ entlichen angezündt/
vnd ein Donnerwitterung erregt wird.

Andere Zeichen in der Natur.

1. Man schreibt/ wenn die Krahe bey Nacht/ vnd die fulica die
Nagelgans/ oder Teucher/ frühe schreyet/ so mercken sie ein Unge-
witter/ welchs sie auß Anleitunge der Natur verkündigen.
2. Wenn die Kränche zu stiller vnnd schöner Zeit des Himmels
sehr schreyen/ so fühlen sie/ daß ein Ungewitter vorhanden sey/wel-
ches sie hiermit den Menschen anmelden.
3. A Elianus schreibt/ daß wenn die Schiffleute die Kränche
vmb einen Ring sehen fliegen/ so stellen sie entweder ihre Schifffart
gar ein/ oder aber eilen/ so viel möglich/ zum Ufer/ vnd Land/denn
es folget gemeiniglich ein groß Ungewitter darauff.
4. Wenn die Sterne des Morgens frühe heuffig auff's schnel-
leste fliegen/ so kömpt als bald ein Ungewitter/ fliegen sie aber
gar gemach/ so verzeycht sich das Ungewitter/ biß auff den Abend.
5. Ist ein Ungewitter vorhanden/ so steht der Storch auff bey
den Beinen/ denn sonst pflegt er nur auff einem Beine zu stehen/
er schudert mit seinen Federn/ verbirgt seinen Schnabel vnter der
Brust/ vnd feret seinen Kopff/ vnd Brust an den Ort/ von welchem
das Wetter kommen sol.
6. Sollen auch die Krebse/ wenn ein Ungewitt er kommen wird/
auß dem Wasser auff's Land kriechen.